

## 弟子品第三

### (一) 宴坐之道——舍利弗 (智慧第一)

爾時，長者維摩詰自念：「寢疾於床，世尊大慈，寧不垂湣？」佛知其意，即告舍利弗：「汝行詣維摩詰問疾。」

舍利弗白佛言：「世尊！我不堪任詣彼問疾。所以者何？憶念我昔曾於林中宴坐樹下，時維摩詰來謂我言：『唯，舍利弗！不必是坐為宴坐也。』

夫宴坐者，

- ① 不於三界現身意，是為宴坐；
- ② 不起滅定而現諸威儀，是為宴坐；
- ③ 不捨道法而現凡夫事，是為宴坐；
- ④ 心不住內，亦不在外，是為宴坐；
- ⑤ 於諸見不動，而修行三十七道品，是為宴坐；
- ⑥ 不斷煩惱而入涅槃，是為宴坐；

若能如是坐者，佛所印可。」

時我——世尊！聞說是語，默然而止，不能加報！故我不任詣彼問疾。」

### (二) 當如法說——大目犍連 (神通第一)

佛告大目犍連：「汝行詣維摩詰問疾。」

目連白佛言：「世尊！我不堪任詣彼問疾。」

所以者何？憶念我昔入毘耶離大城，於里巷中為諸居士說法。時維摩詰來謂我言：『唯，大目連！為白衣居士說法，不當如仁者所說。』

夫說法者，當如法說。

- ① 法無眾生，離眾生垢故；
- ② 法無有我，離我垢故；
- ③ 法無壽命，離生死故；
- ④ 法無有人，前後際斷故；
- ⑤ 法常寂然，滅諸相故；
- ⑥ 法離於相，無所緣故；
- ⑦ 法無名字，言語斷故；
- ⑧ 法無有說，離覺觀故；
- ⑨ 法無形相，如虛空故；
- ⑩ 法無戲論，畢竟空故；
- ⑪ 法無我所，離我所故；
- ⑫ 法無分別，離諸識故；
- ⑬ 法無有比，無相待故；
- ⑭ 法不屬因，不在緣故；
- ⑮ 法同法性，入諸法故；
- ⑯ 法隨於如，無所隨故；
- ⑰ 法住實際，諸邊不動故；
- ⑱ 法無動搖，不依六塵故；

唯，大目連！法相如是，豈可說乎！

		① 法無去來，常不住故； ② 法順空，隨無相，應無作； ③ 法離好醜， ④ 法無增損， ⑤ 法無生滅， ⑥ 法無所歸； ⑦ 法過眼、耳、鼻、舌、身、心； ⑧ 法無高下， ⑨ 法常住不動， ⑩ 法離一切觀行。	
夫說法者，無說無示；其聽法者，無聞無得。譬如幻士，為幻人說法。	當建是意，而為說法：	① 當了眾生根有利鈍； ② 善於知見無所掛礙； ③ 以大悲心贊於大乘； ④ 念報佛恩不斷三寶。	然後說法。』
維摩詰說是法時，八百居士，發阿耨多羅三藐三菩提心；我無此辯，是故不任詣彼問疾。」			

### (三) 不空食施——大迦葉 (頭陀第一)

佛告大迦葉：「汝行詣維摩詰問疾。」						
迦葉白佛言：「世尊！我不堪任詣彼問疾。所以者何？憶念我昔於貧里而行乞，時維摩詰來謂我言：『唯，大迦葉！有慈悲心而不能普，捨豪富，從貧乞。』」	迦葉！住平等法，應次行乞食：	① 為不食故，應行乞食； ② 為壞和合相故，應取揣食； ③ 為不受故，應受彼食；	以空聚相，入於聚落：	① 所見色與盲等， ② 所聞聲與響等， ③ 所嗅香與風等， ④ 所食味不分別， ⑤ 受諸觸如智證， ⑥ 知諸法如幻相：	① 無自性， ② 無他性； ③ 本自不然， ④ 今則無滅。	
	迦葉！若能	① 不捨八邪入八解脫，以邪相入正法； ② 以一食施一切，供養諸佛及眾賢聖；	然後可食。	如是食者，	① 非有煩惱，非離煩惱； ② 非入定意，非起定意； ③ 非住世間，非住涅槃。	是為正入佛道，

			其有施者，	① 無大福，無小福； ② 不為益，不為損，	不依聲聞。
迦葉！若如是食，為不空食人之施也。』					
時我——世尊！聞說是語，得未曾有，即於一切菩薩深起敬心，復作是念：斯有家名，辯才智慧乃能如是！其誰聞此不發阿耨多羅三藐三菩提心！我從是來，不復勸人以聲聞、辟支佛行，是故不任詣彼問疾。」					

#### (四) 行平等法——須菩提 (解空第一)

佛告須菩提：「汝行詣維摩詰問疾。」			
須菩提白佛言：「世尊！我不堪任詣彼問疾。所以者何？憶念我昔，入其舍，從乞食，時維摩詰取我鉢，盛滿飯，謂我言：『	唯，須菩提！若能	① 於食等者，諸法亦等， ② 諸法等者，於食亦等；	如是行乞，乃可取食。
	若須菩提	① 不斷淫怒癡，亦不與俱； ② 不壞於身，而隨一相； ③ 不滅癡愛，起於解脫； ④ 以五逆相而得解脫，亦不解不縛； ⑤ 不見四諦，非不見諦； ⑥ 非得果，非不得果； ⑦ 非凡夫，非離凡夫法； ⑧ 非聖人，非不聖人；	雖成就一切法，而離諸法相，乃可取食。
	若須菩提	① 不見佛， ② 不聞法， ③ 彼外道六師：富蘭那迦葉、末伽梨拘賒梨子、刪闍夜毗羅胝子、阿耆多翅舍欽婆羅、迦羅鳩駄迦旃延、尼犍陀若提子等，是汝之師。	因其出家，彼師所墮，汝亦隨墮，乃可取食。
若須菩提	① 入諸邪見，不到彼岸； ② 住於八難，不得無難； ③ 同於煩惱，離清淨法； ④ 汝得無諍三昧，一切眾生亦得是定； ⑤ 其施汝者，不名福田； ⑥ 供養汝者，墮三惡道； ⑦ 為與眾魔共一手，作諸勞侶，汝與眾魔及諸塵勞，等無有異； ⑧ 於一切眾生而有怨心，謗諸佛，毀於法，不入眾數，終不得滅度。	汝若如是，乃可取食。』	

時我——世尊！聞此茫然，不識是何言？不知以何答？便置鉢欲出其舍。

維摩詰言：『唯，須菩提！取鉢勿懼。於意云何？如來所作化人，若以是事詰，寧有懼不？』

我言：『不也。』

維摩詰言：『一切諸法，如幻化相，汝今不應有所懼也。所以者何？一切言說，不離是相；至於智者，不著文字，故無所懼。何以故？文字性離，無有文字，是則解脫；解脫相者，則諸法也。』

維摩詰說是法時，二百天子得法眼淨，故我不任詣彼問疾。」

## (五) 觀心說法——富樓那 ( 說法第一 )

佛告富樓那彌多羅尼子：「汝行詣維摩詰問疾。」

富樓那白佛言：「世尊！我不堪任詣彼問疾。」

所以者何？憶念我昔，於大林中，在一樹下，為諸新學比丘說法，時維摩詰來謂我言：『唯，富樓那！

① 先當入定，觀此人心，然後說法，無以穢食置於寶器。

② 當知是比丘心之念，無以琉璃同彼水精。

③ 汝不能知眾生根源，無得發起以小乘法。

① 彼自無瘡，勿傷之也；  
② 欲行大道，莫示小徑；  
③ 無以大海，內於牛跡；  
④ 無以日光，等彼螢火。

富樓那！

① 此比丘久發大乘心，中忘此意，如何以小乘法而教導之？  
② 我觀小乘智慧微淺，猶如盲人，不能分別一切眾生根之利鈍。』

時維摩詰即入三昧，令此比丘自識宿命，曾於五百佛所植眾德本，回向阿耨多羅三藐三菩提，即時豁然，還得本心；於是，諸比丘稽首禮維摩詰足，時維摩詰因為說法，於阿耨多羅三藐三菩提，不復退轉。

我念聲聞不觀人根，不應說法，是故不任詣彼問疾。」

## (六) 說實相法——摩訶迦旃延 ( 論議第一 )

佛告摩訶迦旃延：「汝行詣維摩詰問疾。」

迦旃延白佛言：「世尊！我不堪任詣彼問疾。」

所以者何？憶念昔者，佛為諸比丘略說法要，我即於後，敷演其義，謂：

① 無常義、  
② 苦義、  
③ 空義、  
④ 無我義、  
⑤ 寂滅義。

<p>時維摩詰來謂我言：『唯，迦旃延！無以生滅心行，說實相法。』迦旃延！</p>	<p>① 諸法畢竟不生不滅，是無常義； ② 五受陰通達空無所起，是苦義； ③ 諸法究竟無所有，是空義； ④ 於我、無我而不二，是無我義； ⑤ 法本不然，今則無滅，是寂滅義。」</p>
<p>說是法時，彼諸比丘心得解脫，故我不任詣彼問疾。」</p>	

### (七) 得真天眼——阿那律 (天眼第一)

<p>佛告阿那律：「汝行詣維摩詰問疾。」</p>		
<p>阿那律白佛言：「世尊！我不堪任詣彼問疾。</p>		
<p>所以者何？憶念我昔，於一處經行，時有梵王名曰『嚴淨』，與萬梵俱，放淨光明，來詣我所，稽首作禮，問我言：『幾何阿那律天眼所見？』</p>		
<p>我即答言：『仁者！吾見此釋迦牟尼佛土三千大千世界，如觀掌中庵摩勒果。』</p>		
<p>時維摩詰來謂我言：『唯，阿那律！天眼所見，</p>	<p>① 為作相耶？ ② 無作相耶？</p>	<p>① 假使作相，則與外道五通等； ② 若無作相，即是無為，不應有見。』</p>
<p>世尊！我時默然。彼諸梵聞其言，得未曾有！即為作禮而問曰：『世孰有真天眼者？』</p>		
<p>維摩詰言：『有佛世尊，得真天眼，常在三昧，悉見諸佛國，不以二相。』</p>		
<p>於是，嚴淨梵王及其眷屬五百梵天，皆發阿耨多羅三藐三菩提心，禮維摩詰足已，忽然不現！故我不任詣彼問疾。」</p>		

### (八) 罪當直除——優波離 (持戒第一)

<p>佛告優波離：「汝行詣維摩詰問疾。」</p>					
<p>優波離白佛言：「世尊！我不堪任詣彼問疾。</p>					
<p>所以者何？憶念昔者，有二比丘犯律行，以為恥，不敢問佛。來問我言：『唯，優波離！我等犯律，誠以為恥，不敢問佛，願解疑悔，得免斯咎！』我即為其如法解說。</p>					
<p>時維摩詰來謂我言：『唯，優波離！無重增此二比丘罪！當直除滅，勿擾其心。所以者何？</p>	<p>彼罪性：</p>	<p>① 不在內， ② 不在外， ③ 不在中間。</p>	<p>如佛所說：</p>	<p>① 心垢故眾生垢，心淨故眾生淨；心亦不在內、不在外、不在中間。 ② 如其心然，罪垢亦然。 ③ 諸法亦然。</p>	<p>不出於如。</p>
<p>如優波離以心相得解脫時，寧有垢不？』</p>					
<p>我言：『不也。』</p>					
<p>維摩詰言：『一切眾生心相無垢，亦復如是。』</p>					

唯，優波離！	① 妄想是垢，無妄想是淨； ② 顛倒是垢，無顛倒是淨； ③ 取我是垢，不取我是淨。	優波離！	① 一切法生滅不住。如幻，如電； ② 諸法不相待，乃至一念不住，諸法皆妄見。如夢，如焰，如水中月，如鏡中像；	以妄想生。	① 其知此者，是名奉律； ② 其知此者，是名善解。』
於是，二比丘言：『上智哉！是優波離所不能及，持律之上而不能說。』 我答言：『自捨如來，未有聲聞及菩薩，能制其樂說之辯，其智慧明達，為若此也！』 時二比丘疑悔即除，發阿耨多羅三藐三菩提心，作是願言：『令一切眾生皆得是辯。』故我不任詣彼問疾。」					

### (九) 真出家人——羅睺羅 (密行第一)

佛告羅睺羅：「汝行詣維摩詰問疾。」					
羅睺羅白佛言：「世尊！我不堪任詣彼問疾。所以者何？憶念昔時，毘耶離諸長者子來詣我所，稽首作禮，問我言：			『唯，羅睺羅！汝佛之子，捨轉輪王位，出家為道。其出家者，有何等利？』		
我即如法為說出家功德之利。					
維摩詰來謂我言：	『唯，羅睺羅！不應說出家功德之利。	所以者何？	① 無利、無功德，是為出家。 ② 有為法者，可說有利、有功德。 ③ 夫出家者，為無為法；無為法中，無利，無功德。		
	羅睺羅！出家者，		① 無彼無此，亦無中間； ② 離六十二見，處於涅槃； ③ 智者所受，聖所行處； ④ 降伏眾魔，度五道，淨五眼，得五力，立五根； ⑤ 不惱於彼，離眾雜惡； ⑥ 摧諸外道，超越假名； ⑦ 出淤泥，無繫著； ⑧ 無我所，無所受； ⑨ 無擾亂，內懷喜； ⑩ 護彼意，隨禪定，離眾過。		
於是，維摩詰語諸長者子：『汝等於正法中，宜共出家。所以者何？佛世難值！』 諸長者子言：『居士！我聞佛言，父母不聽，不得出家。』 維摩詰言：『然，汝等便發阿耨多羅三藐三菩提心，是即出家，是即具足。』 爾時，三十二長者子，皆發阿耨多羅三藐三菩提心，故我不任詣彼問疾。」					

## (十) 佛身法身——阿難 (多聞第一)

佛告阿難：「汝行詣維摩詰問疾。」	
阿難白佛言：「世尊！我不堪任詣彼問疾。 所以者何？憶念昔時，世尊身小有疾，當用牛乳，我即持鉢，詣大婆羅門家門下立。 時維摩詰來謂我言：『唯，阿難！何為晨朝，持鉢住此？』 我言：『居士！世尊身小有疾，當用牛乳，故來至此。』	
維摩詰言：	<p>① 『止！止！阿難！莫作是語！如來身者，金剛之體，諸惡已斷，眾善普會，當有何疾？當有何惱？』</p> <p>② 默往阿難！勿謗如來，莫使異人聞此麤言；無令大威德諸天，及他方淨土諸來菩薩得聞斯語。</p> <p>③ 阿難！轉輪聖王，以少福故，尚得無病，豈況如來無量福會普勝者哉！</p> <p>④ 行矣，阿難！勿使我等受斯恥也。外道、梵志，若聞此語，當作是念：何名為師？自疾不能救，而能救諸疾人！可密速去，勿使人聞。</p> <p>⑤ 當知：阿難！諸如來身，即是法身，非思欲身。佛為世尊，過於三界；佛身無漏，諸漏已盡；佛身無為，不墮諸數。如此之身，當有何疾？』</p>
時我——世尊！實懷慚愧，得無近佛而謬聽耶！	
即聞空中聲曰： 『阿難！	<p>① 如居士言，但為佛出五濁惡世，現行斯法，度脫眾生。</p> <p>② 行矣，阿難！取乳勿慚。』</p>
世尊！維摩詰智慧辯才，為若此也，是故不任詣彼問疾。」	

如是，五百大弟子，各各向佛說其本緣，稱述維摩詰所言，皆曰：「不任詣彼問疾。」